

Paur kute Epexukam me jamã pi'ôk no'ôk ne ja.

Paur ne krĩrAXBê Epexukam me jamã pi'ôk no'ôk ne. Nãm me Paurbê ijê nhyM meBê ijê djâkam âmkam ne memã pi'ôk no'ôk ne. Kute meo tÿx ne meo kĩnhmã ne memã pi'ôk no'ôk ne. Ne memã Metĩndjwÿnh kute mÿjja kunĩ'ã karõ amirĩt ne. Metĩndjwÿnh kute pyka nhĩpêx kêtri ne gwaj bajã amim karõ ne kam jakam arÿm Jejukôt gwaj bapytãro tẽn kam amũ 'ôkam dja bajaxwe kunĩo apêx. Be, pykabê ar babari dja Xatanajmê õ me karõ punumê gwaj bawÿr prõt. Be, gwaj baje Jeju mar kunĩ dja gwaj tu Xatanajmã baku'ê tÿx ne amijo aptàn o apa. Kam ne Paur apÿnh memã 'ã karõ, me kute katãt amijo ba'ã memã karõ.

Metĩndjwÿnh ne Kritukôt mÿjja kunĩ o ba. Ne Kritukôt mÿjja kunĩ 'y ne o ban kam ajte kôt gwaj bapytã. Ne kôt gwaj bajo kĩnh. Be, Kritu ne gwaj baje Jeju mar kunĩmã Bẽnjadjwÿr. Kute gwaj bajo djuw mexo baja pumũ. Nãm ã Paur memã o amirĩto ane.

¹ Ba ne ba ibê Paur. Metĩndjwÿnh ne Jeju Kritumã ijã karõ nhyM arÿm ijano ba memã 'ã idjujarênh ar iba.

KrĩrAXBê Epexukam Jeju kute ar ajo õ me ja ne ba pi'ôk kôt ar amã ikabên. Gar aje arek Kritu Jeju kôt ar amijo aban 'ã adjukanga kêtja ba pi'ôk no'ôkkam ar amã ikabên.

² Metĩndjwÿnhbê ne me Babãm. Ne Bẽnjadjwÿr djwÿnhbê ne Jeju Kritu. Gê ar tu kum ar akaprĩn* ar ajo ba gar adjumar mex rã'ã ne.

* 1:2 Djãm ar ga ne gar adjukaprĩ nhyM ar pãnh arÿm kum ar akaprĩ Kati. Ar ta ne ar tu kum ar akaprĩkumrêx.

Mỳjja kunĩ kêttri Metĩndjwỳnh kute amijo me utàr.

Rô 8.29; Tex k 1.4; A Tex 2.13; Ped k 1.2

³ Be, Metĩndjwỳnh ne ukaprĩ:kumrẽx. Kute Bẽnjadjwỳr djwỳnhbê Jeju Krituo ba nhym kute o Bãm. Metĩndjwỳnh ta ne gwaj bajo djuw mex. Gwaj tu amim Kritu markumrẽx nhym prĩne kàjkwakam ò mỳjja kunĩo gwaj bajo djuw mex. ⁴ Ga, kute amijo gwaj bapytàrja pumũ. Mỳjja kunĩmẽ me kunĩ kator kêttri ne amijo gwaj bapytàn amim,

—Be, me wã dja me tu amim Kritu markumrẽx ba arỳm meo inhökumrẽx nhym me arỳm imã axwe kêtikumrẽx. Nãm ã kum gwaj bajabêkam gwaj bajã amim ane. ⁵ Amrêbê me kunĩ kêttri, mỳjja kunĩ kêttri ne ta kum gwaj bakĩnhkumrẽx ne amijo gwaj bapytã. Ne kam tu amim gwaj bajã karökumrẽx ne amim,

—Me wã dja me tu amim Jeju Kritu markumrẽx ba arỳm meo ikrakumrẽx, ane. ⁶ Metĩndjwỳnh tu kum gwaj bakaprĩ:kumrẽx. Nãm kum Kra jabêkumrẽx, ne Krakôt kum gwaj badjwỳ kaprĩ:kumrẽx. Dja gwaj kam bakunĩ:kum,

—E kum, djãm adjukaprĩ ngri: got? Adjukaprĩ ra:xi. Amexti:re. Me imã akĩnhkumrẽx, anhỹro baba. Gwaj baje ã kum anhỹro baba kadjy ne arỳm amijo gwaj bapytã.

⁷ Nãm Krakôt kum gwaj bakaprĩ:kumrẽx. Kra ne amikamrôo gwaj bajaxweo pãnh. Nhym kam arỳm gwaj bajaxwe maro aknon bakam ngryk kêt ne. Nãm ukaprĩ:kumrẽxkôt ã gwaj bajaxweo ane. ⁸ Kute prĩne mỳjja kunĩ mar. Kute amikukãm mỳjja kunĩmẽ me kunĩ'ã amim karõ. Ne kam gwaj badjwỳ, kute amim gwaj bajã karõ kôt arỳm kum gwaj bakaprĩ:kumrẽx.

⁹ Ta ne amrêbê: kute mỳjja kunĩ markôt arỳm amim kabẽn'ã karõ. Ta ne kum kabẽn kĩnh ne arỳm amim kabẽn'ã karõ ne kam memã arẽnh kêt 'ătũm. Ne kam ajte

ta arým jakam gwaj bamã kabënja jarë. ¹⁰ Nãm jakam gwaj bamã,

—Dja ĩ me kunĩ kute aminhinomã amimënh djã nhõ akati bõx ba kam Kritu'ã me kunĩmë mỳjja kunĩo akuprõ. Kàjkwakam mỳjja nãr pykakam mỳjja dja ba Kritu'ã kunĩo akuprõ nhym arým kunĩo ba, ane. Amrëbê kute kabën jarënh kêt ja ne jakam arým gwaj bamã arë.

¹¹ Amrëbê mỳjja kunĩ kêttri, me kêttri ne amijo me ibê idjaer pytà. Nãm tu me ijã amim karõkumrëx ne amim,

—Be, me wã dja ba memã amak bõ nhym me arým tu amim Kritu markumrëx ba kam arým meo aminhõ. Nãm ã me ijã amim ane. Ta ne kute amim mỳjja kunĩmë me kunĩ'ã karõ. Kute amim 'ã karõ kõt ne mrãmri kute o apõxkumrëx ne kute o bakumrëx. Djãm me ibê idjaerbit ne amijo me ipytà? Kati. Mỳjja kunĩ:. Kute amim mỳjja kunĩ'ã karõ kõt arým mrãmri kute o apõx ne o bakumrëx.

¹² Mỳj kadjy ne amijo me ibê idjaer pytà? Bir, ba me ikumrëx ne ba me tu amim Kritu markumrëx ne kõt ar amijo iba. Me kunĩ dja me me ijã abenmã kum,

—Ga, me kute Kritukõt katàt ar amijo baja pumũ. Kritu mexti:rekumrëx. Me bamã kĩnhkumrëx, anhyro ba. Ja kadjy ne amijo me ipytà. ¹³ Me ibê idjaer kumrëx ne ba me tu amim markumrëx. Nhym kam me arým me abajtemmã Kritu'ã ujarënh ny katàtkumrëxja jarë ga me aman tu amim markumrëx. Nhym kam Metĩndjwýnh arým me ajaxwebê me apytàn kam me amã Karõ jano.

Amrëbê Kritu kute me bamã Karõ jarënhja ne me amã ano nhym arým me ajo ba. Ga, me kute mỳjja'ã aminhidji janhõr nhym arým amirĩtkumrëxja pumũ. Me badjwý Metĩndjwýnh arým me bamã Karõ jano nhym arým me bajo ba. Me bajo ba gu me arým amim,

—Mrãmri ne Metĩndjwýnh arým ijo krakumrëx. Ga, arým kute imã Karõ janor nhym kute ijo bakumrëxja

pumũ, ane. Karõ ne me bajo ba gu me ã amim ane. Kam, gu me baje mrãmri ja markumrêx. Arým Metĩndjwýnh kute me bajo kraja ne gu me baje mrãmri markumrêx.

¹⁴Ga, me kute memã mýjja rũnh nhõrmãn kam kukãm kute memã mýjja kryre nhõrja pumũ. Me amim kryre jamýn arým amiwýr rũnhja kamnhĩxkumrêx.

Me badjwý Metĩndjwýnh arým me bamã Karõ jano nhym arým me bajo ba gu me arým amim,

—Ga, Metĩndjwýnh arým kute imã Karõ janorja pumũ. Ga, kute ijo baja pumũ. Mrãmri dja ba kàjkwakam kõt itĩn ne ar iba rã'ã: rã'ã ne, ane. Karõ ne me bajo ba gu me ã amim anen kam arým baje mrãmri ja markumrêx. Mrãmri kàjkwakam Metĩndjwýnhkõt batĩn ne ar baba rã'ã: rã'ãja baje mrãmri markumrêx ne amiwýr kamnhĩxkumrêx. Dja gu me Metĩndjwýnh kõt batĩnmãja maro baba: nhym Kritu arým bõx ne amikõt me bajo mõ. Metĩndjwýnh kute amijo me bapytãrjao mõ. Dja amikõt me bajo mõ nhym me kunĩ arým abenmã kum,

—Metĩndjwýnh me:xkumrêx. Me bamã kĩnhkumrêx, ane.

Kute Metĩndjwýnhmã meo à'wýr.

Kor 1.9; Pir 1.9; Tex k 5.23; Idja 13.20

¹⁵⁻¹⁶Kam ne ba mã Metĩndjwýnhmã ar akam amikĩnh jarẽho iba. Ar ga ne gar arým tu amim Bẽnjadjwýr djwýnh Jeju markumrêx ne kam amã Jeju nhõ me ja kunĩ jabê:. Nhym kam me arým imã ar ajarẽ ba ar aman mã Metĩndjwýnhmã ar akam amikĩnh jarẽho iban kam mã kum ar ajo a'awn kum,

¹⁷—Metĩndjwýnh, ga ne ga Bẽnjadjwýr djwýnhbê Jeju Krituo aba. Djünwã, amexti:re. Dja ga Akarõo aro aba gê ar arým ô'ã katãt akabẽn markumrêx nhym arým arkum Akrao amirĩtkumrêx gê ar mar mexkumrêx. ¹⁸Anhõ me ja dja me arým kàjkwakam anhõ mýjja mexti:rekumrêxo

aminhõ. Mýjja ja kadjy ne ga amiwýr ar 'wýr ne aro aba. Dja ga arkum anhõ mýjjao amirít gê ar prĩne mexti:rekõt kuman amiwýr kamnhĩxkumrêx. ¹⁹ Me kute tu amim amarkumrêxja dja ga memã tỳx jadjà. Aje memã tỳx jadjàr kadjy ajitỳ:xi. Me kadjy ajitỳxo abê kumkati. Mỳj ne ga aje meo tỳx kadjy ajitỳxkam kute? Tãm dja ga arkum o amirít, gê ar prĩne kuma. Anhõ mýjja ja dja ga arkum o amirít gê ar kuma. Nã bãm ã ar akadjy Metĩndjwỳnh 'wỳro ane.

Metĩndjwỳnh ne 'itỳ:xi. ²⁰ Ga, Kritu arỳm tykkam Metĩndjwỳnh 'itỳxo kam àpênhja pumũ. 'Itỳxo kam àpênhõ kute akubyn o tĩnja pumũ. Nãm ajte kàjkwa djwỳnhkam o wabin aminhikô'ã ÿr. Raxo kute me rũnh jakrenh mex kadjy amidjubôk'ãnh ÿr.

²¹ Kỳjrũm, me rũnh kunĩ nhiby ÿr. Nhym arỳm rax ne tỳxo me akrenh me:x ne. Nhym pa:rbê memã ÿr djwỳnh kunĩmẽ me rũnh kunĩmẽ me 'itỳx kunĩmẽ me bẽnjadjwỳr kunĩmẽ ne me kum ngri:re. Jakam me bakam me rũnh kunĩ ne me kum ngri:re, nàr amrê pyka ny morkam me rũnh kunĩ ne me kum ngri:re. Me kunĩ ne me kum ngri:ren kajgo:.

²² Pa:rbê me kunĩ kum kajgo me:xi. Metĩndjwỳnh arỳm me rũnh kunĩ kadjy Jeju'ã ra:x mẽ. Ne õ me kute amim Jeju marja kunĩ kadjy 'ã rax mẽ nhym arỳm meo ba. Kute meo bakam arỳm kute me krã pyràk.

²³ Ga, me bakrãja pumũ. Me bakrãkam ne gu me badjumar nhym kam kukwakam amũ me banhĩ amingrêk ne ar me bajo ba. Me bakrãkam gu me badjumar ne arỳm me banhikrao badjapênh nàr me baparkam bamrãnh. Me bakrã amũ me bakukràdjà kunĩ ngrêk ne me bajo ba. Kritudjwỳ kute me bakrã pyràk ne me bakunĩo ba, me babê õ me ja kute ta ã pyràkjao ba, me bangrêk ne me bajo ba, me baje amim mar kunĩjao tuknĩn ar bajo ba. Ta ne

kute amiraxo pykamẽ kàjkwamẽ mỳjja kunĩo tuknĩn ar o ba kute me badjwỳ me bajo ba.

2

Metĩndjwỳnh kute akubyn Krituo tĩnkõt õ me jadjwỳo tĩn.

Kô k 6.11; Xit 3.3

¹ Nhyr be, ar ga ne gar amrẽbẽ ajamakkre kêt kute me tyk amakkre kêt pyræk ne ar aba. Gar *Metĩndjwỳnh* kabẽnkam amikrào aban mekõt ajaxwe. ² Me kum *Metĩndjwỳnh* kĩnh kêtja kukràdjà kõt ne gar amijo aba. Gwaj banhiby me karõ punu nhõ bẽnjadjwỳr kukràdjà kòtdjwỳ ne gar amijo aba. Me karõ nhõ bẽnjadjwỳrja tãm ne jakam me amakkre kêt prãmjao ba. ³ Amrẽbẽ gwaj bakunĩdjwỳ ne gwaj mekõt amidjwỳnhbito kĩho baban arỳm bajaxwe:. Djãm me'õ ne gwaj bajo axwe gwaj bajaxwe? Kati. Gwaj ba ne gwaj bamã bajaxwe prãm ne amim 'ã karõn arỳm kõt bajaxwe. Amrẽbẽ gwaj bajaxwekam ne *Metĩndjwỳnh* gwaj bakam ngryk ne. Me axwe kunĩmẽ gwaj bakam ngry:k ne.

⁴ Djãm gwaj bakam ngryk rã'ãmã? Kati. *Metĩndjwỳnh* kum gwaj bakaprĩ:kumrẽx ne kum gwaj bajabẽ:. ⁵ Gwaj bajaxwekam ne gwaj bajamakkre kêt kute mrãmri ne me tyk amakkre kêt pyræk. Gwaj kam tu amim Kritu markumrẽx ne kam mrãmri ne baje me tyk ne akubyn tĩn pyræk. *Metĩndjwỳnh* ne jakam Kritumẽ ro'ã akubyn gwaj badjwỳ gwaj bajo tĩn ne. Ta ne tu kum ar akaprĩn arỳm ar apytà.

⁶ *Metĩndjwỳnh* ne jakam Kritumẽ ro'ã akubyn gwaj badjwỳ gwaj bajo tĩn. Gwaj kam arỳm bajamak mex ne ar baba nyo ar baba. Kritumẽ ro'ã ar baban ar baba rã'ã: rã'ã ne kute mrãmri ne jakam on kàjkwakam Kritumẽ ro'ã ar baba pyræk. ⁷ Mỳj kadjy ne gwaj Kritumẽ ro'ã ar baba?

Bir, Metĩndjwỳnh gwaj bakam ukaprĩkumrẽx. Kute me kunĩmã gwaj bakam ukaprĩo amirĩt kadjy ne gwaj Kritumẽ ro'ã ar baba. Gwaj tu amim Kritu Jeju markumrẽx nhym kam gwaj bakam òdjànkhkumrẽx. Ukaprĩ:kumrẽx kòt ne gwaj bakam òdjànkhkumrẽx. Amrẽ amex mõi jakam ne amũ nĩ:jkamdjwỳ dja memã gwaj bakam ukaprĩjao amirĩt rã'ã: rã'ã rã'ã.

⁸ Be, Metĩndjwỳnh ta ne kum ar akaprĩ. Ar ga ne gar amex kêtumrẽx, nhym ta kum ar akaprĩn ar amã Kritu jano nhym ty. Gar kam tu amim markumrẽx, nhym arỳm kòt amim apytà. Djãm ar amex ne ar adjukaprĩ gar ga: amipytà? Kati. Metĩndjwỳnh ta ne kum ar akaprĩn ar amã Kritu janon kam ta amim ar apytà. ⁹ Djãm we kute ar amã,

—Be, ga ne ga amex ne adjukaprĩkumrẽx, anhỳr, ne kam we kòt kute amim ar apytàr? Arkati. Nãm ren ã ar ajõmã ane, gar ren arĩk ga amimexo adjãmra ar aba.

¹⁰ Nhym be, kati. Metĩndjwỳnh ta ne gwaj bajo mex gwaj kam arỳm badjukaprĩ. Kritu Jeju tyn arỳm akubyn tĩn nhym kòt arỳm gwaj bajo ny. Metĩndjwỳnh ta ne gwaj bajo ny gwaj aminhijukri amidjan kam arỳm bamã me kaprĩo baba. Ar adjukaprĩ ja ne Metĩndjwỳnh amim 'ã karõ. Gwaj bakêtri amim 'ã karõ. Ne kam tũmràm arỳm gwaj bajo ny gwaj arỳm kòt bamã me kaprĩo baba.

Mebê idjaermẽ me bajtem arỳm Kritu kòt abeno õbikwa.

¹¹ Be, amrêbê ne ba me imã me akurêo iba. Ga me abajtemkam ne ba me ibê idjaerkam imã me akurêo iba. Ba me me ajã memã kum,

—Me wã ne me my nhinhu kà rênh kêt. Metĩndjwỳnh kum me kĩnh kêt. Me ba ne ba me imy kà rênh. Nhym Metĩndjwỳnh kum me ikĩnhkumrẽx, ane. Djãm mrãmri me kute me imy kà rênhkam arỳm me imex? Kati. Me imy kàbit rênh.

¹² Me abajtemkam ne ga me amrêbê aje Kritu mar kêtukumrêx ne ate amijo aba. Ba me ibê idjaer ne ba me ari me ajo kubajtemo iba. Metîndjwÿnh ne amrêbê: kute me ipytâr'ã me imã,

—Me kute tu amim ikra markumrêx dja ba amim me utà, ane. Ne kam 'ã me imã apÿnh mÿjja jarênh mãmджи ba me maro iba. Djãm me abajtemmã ne Metîndjwÿnh mÿjja ja jarê? Kati. Kute me amã arênh kêt ga me aje mar kêt. Kam ne ga me Metîndjwÿnhkôt atîn kadjy kêt ne aje amiwÿr atîn kamnhÿx kêt ne aje mekôt Metîndjwÿnh mar kêt. Ne kam ate kubê amijo aba. Tãm dja ga me nhÿn ama ne mar rã'ã ne.

¹³ Metîndjwÿnh bê ne ga me amrêbê ate ar amijo aba. Nhym be, jakam ne arÿm Kritu Jeju kamrô me bakadjy prôt ne nhym me bapãnh ty. Ga me kam kôt ar amijo aba nhym arÿm ar me ajo ba.

¹⁴ Ta ne me bamã,

—Me abeno anhôbikwa, ane. Nãm ã me bamã ane, gu me arÿm abeno banhôbikwa. Me abajtemmê me ibê idjaermê ne gu me bamã aben kurê. Me bamã aben kurêja ne kute mrãmri ne gu me baje aben nêje ka'ê pyræk. Gu me kam Jeju kabênkôt arÿm abeno banhôbikwa nhym kute mrãmri ne aben nêje ka'ê ngrành pyræk.

¹⁵ Môjdjê kute Metîndjwÿnh kukwakam mebê idjaermã 'ã karôkam kukràdjàja ne Kritu arÿm o kajgo. Pÿte'y'ã tyko arÿm o kajgon arÿm ajte mar kêt. Mÿj kadjy ne o kajgo? Bir, nãm o kajgon arÿm amiwÿr me bajo akêx. Amiwÿr me bajo akêx gu me arÿm abeno banhôbikwa. Ga, kute me bajo nyja pumû. Gu me arÿm baje mrãmri banhÿ tipdji pyræk. Ja kadjy ne Môjdjê kukràdjào kajgo. ¹⁶ Kritu pÿte'y'ã tyko ne me bajo aben pydjïn kam Metîndjwÿnh'ÿr me bajo akêx ne. Gu me kam arÿm o banhôbikwan kam bamã aben kurê kêt.

¹⁷ Kritu arým me abajtem'yr bôx. Metĩndjwýnh bê amijo akre raxkam arým me awýr bôx. Me awýr bôx ne arým kàj bê me amã kabën jarë. Me aje Metĩndjwýnho anhõbikwa kadjy ne me amã kabën jarë. Aje me aje me ijo anhõbikwa kadjy ne me amã kabën jarë. Ne, me ibê idjaer ije Metĩndjwýnh kôt amijo ibakam Kritu arým me iwýr bôx ne kàj bê me imã kabën jarë. Me ije Metĩndjwýnho inhõbikwa kadjy ne me imã kabën jarë. Ne me ije aje me ajo inhõbikwa kadjy me imã kabën jarë.

¹⁸ Djãm apýnh me Babãm'yr me bapry? Kati. Arým ne me Babãm'yr me bapry pydji. Metĩndjwýnh Karõ pydji. Me ibê idjaermë me abajtemmë ne gu me Karõ pydji kôt me Babãm'yr bôx.

¹⁹ Kam ne ga me arým abajtem kêt ne me akàtàm kêt. Metĩndjwýnh ne arým me ajo õ me ja ne me ajo õbikwa. Me ibê õ me tũmmë ro'ã me ajo õbikwa.

²⁰ Gu me kam arým baro'ã babê Metĩndjwýnh nhõ këno kikreti pyræk. Kritu ne ar ijano bar me awýr bôx ne me amã arë. Ar ba ne bar Metĩndjwýnh kukwakam me amã arë, ga me kabën ma. Ar ba ne bar ije mrãmri ne kikreti kadjy pyka mã: par krax ku'ê pyræk. Jeju Kritu kute mrãmri ne kikre par krax kadjy kum kajpar djà djwýnh pyræk.

²¹ Kum kajpar djà djwýnh kôn timer me prĩne kën jadjwýr mexo mõ:. Kôn timer ne me aben nhiby kën jadjwýr mexo mõ. Ne kam aben nhiby kën jadjwýr mexo mõ: nhym Metĩndjwýnh nhõ kikreti arým abatãnh mõ. Metĩndjwýnh Karõdjwý ã me bajo anen Bënjadjwýr djwýnhbê Jeju Kritu kôt me bapymjýr mexo mõ. Metĩndjwýnh me ibê idjaero õbikwan kam me abajtemo õbikwa gu me arým Jeju kôt djan arým batypdjın dja. Batypdjın djan arým Metĩndjwýnhmã bamexkumrëx ne.

²² Djām me ibê idjaerbit ne me ijo òbikwa? Kati. Me abajtemdjwỳ. Gu me kam arỳm baro'ã babê Metĩndjwỳnh nhõ kěno kikreti pyràk. Metĩndjwỳnh ne me bamã Karõ jano. Kute me bamě amijo kajkep kadjy ne me bamã ano.

3

Metĩndjwỳnh kute me bajtem'ỵr Paur janor.

¹ Metĩndjwỳnh kute me amã Karõ janorkam ne ba arỳm kum me ajo a'uw. Me abajtemo ne ba kum a'uw ne me amã ne ba Jeju Kritu'ã idjujarěnh ar iba nhym me arỳm 'ã kum ikurêñ idjuwpre. Ba ibê Paur ne me arỳm idjuwpre.

² Me ga ne ga me arỳm ama. Metĩndjwỳnh ta ne kute imã me ajã karõ ga me arỳm ama. Nãm imã,

—Arỳm imã me bajtemdjwỳ kaprĩ. Ga dja ga memã 'ã adjujarěnh djwỳnh, ane. Tãm ne ga me aje mar jabej ba ajte akubyn me amã arě. ³ Kum me abajtem kaprĩmã ne kute amrěbê arěnh kêt. Ne kam jakam ba imã arỳm arě ba arỳm me amã 'ã pi'òk no'òk ngrire ga me arỳm omũn aman ⁴ badjwỳ ima. Metĩndjwỳnh kute Kritu'ã mỳjja jarěnh kêt ba ije pĩne marja dja ga me ama.

⁵ Nãm amrěbê kute memã arěnh kêt nhym pykakam me kra'õ kute mar kêt. Me kute aben djõ'ã mar kêt. Nhym kam Metĩndjwỳnh Karõ arỳm jakam ar imã arě bar arỳm jakam kuma. Kritu ne ar ijano bar ibê õ àpěnhkumrěx ne kukwakam idjujarěnh ar iba. Nãm ar imã arě bar jakam arỳm kuma.

⁶ Kute mỳjja jarěnh kêtja arỳm ar imã arě ar imã,

—Djām me bajtemmẽ me abê idjaermẽ arek apỳnh ar abamã got? Arkati. Dja ga me akunĩ tu amim Kritu'ã ujarěnh ny markumrěx ne arỳm aro'ã kôt ar aba. Ne kam arỳm aro'ã Metĩndjwỳnh nhõ mỳjjao aminhõn aro'ã kôt ar aban kam aje anhĩ tipdji pyràk. Ne kam Metĩndjwỳnh kute amrěbê: memã mỳjja jarěnh mãmđjija me aro'ã amim

aby. Me abê idjaermě me abajtemmě dja ga me tu amim Kritu markumrěx ne arým me aro'ã amim aby, ane. Tãm ne ar imã arě ba arým kuma.

⁷ Metĩndjwýnh ta ne 'itỳxkõt ijo ban tu kum ikaprĩ.* Ne kam arým imã me'ã karõ ba memã Kritu'ã kaběn nyja'ã idjujarěnh ar iba.

⁸ Metĩndjwýnh nhõ me ja kunĩ ne me kute rũho ijakrenh mex. Ba kam bajbit ikajgo me:x ne. Nã bãm te ikajgo: nhym Metĩndjwýnh ta arým tu kum ikaprĩn kam arým imã idjãpěnh djã'ã karõ. Ta ne imã,

—Ga dja ga me bajtemmã kãj bê Kritu'ã adjujarěnh ar aba, ane. Kritu ne memã kĩnh djã rũ:nh ngã, krãptĩ: ngã. Me te: kute kĩnh djã'ã ujarěnh inomã měnhmã. Kritu kõt me kĩnh djã ja'ã ne ba idjujarěnh ar iba.

⁹ Kum ikaprĩkam ne imã,

—Ije memã ikaběn jarěnh kětja dja ba amã arě ga arým prĩne ama. Ije amim me bajtem pytãrmã. Tãm dja ga aman me kunĩmã arěnh amirĩto aba. Nãm ã imã ane. Metĩndjwýnh ta ne Krituo mýjja kunĩ nhipěx. Adjãkamã kute Jeju Krituo mýjja kunĩ nhipěx ne kute me abajtem pytãr'ã amim karõn kute me bakukãmãremã arěnh kět tãm ne imã arě.

¹⁰⁻¹¹ Mýkam ne kute amrěbê me bakukãmãremã me apytãr jarěnh kět? Bir ga, Kritu kute ajbir pykakam abenã me baměnhja pumũ. Kam ne me kãjkwakam aparmã abenã me bapumũnhõ nhỹ. Kãjkwakam me bēnjadjwýrmě me rũnhmě ne me jakam me bapumũnhõ nhỹ. Me baje amim Jeju mar kunĩja pumũnhõ nhỹn arým me bakõt Metĩndjwýnh raxmã kato. Me kute me bakõt Metĩndjwýnh raxmã kator kadjy ne Metĩndjwýnh kute

* 3:7 Djãm Paur ta axwe kět nhym pãnh kum kaprĩ Kati. Paur te axwe kětã nhym ta arým tu kum kaprĩ.

amrêbê me bakukãmãremã arênh kêt. Memã kute me abajtem pytâr ne kute abenã me bamênhja kute arênh kêt.

Nãm me me bapumünho nhÿn me bajã abenmã kum,

—Be, djãm mrãmri ne djãm Metĩndjwÿnh kute prĩne abenã me mênh mar mexkumrêx. Nãm mÿjja kunĩ kêtri amim me'ã karøkumrêx. Djãm kabêno kute amikapêr kâr? Kati. Nãm Bẽnjadjwÿr djwÿnhbê Jeju Kritu'ÿr meo akêx nhym tu kute ar meo bakumrêx. Djãm Metĩndjwÿnh no kêt got? Ga, prĩne kute aben ã me mênh mar mexkumrêxja pumũ. Ga, me kute abeno ôbikwa mexkumrêxja pumũ, ane. Nãm me me bapumünho nhÿn ã abenmã ane. Me kute kàjkwakam ã abenmã anhÿr kadjy ne Metĩndjwÿnh kute amrêbê me bakukãmãremã arênh kêt. Kute memã me abajtem pytâr ne kute aben ã me bamênhja jarênh kêt.

¹² Metĩndjwÿnh ne uma:. Kam dja me kute Kritu mar kêtja kum uma:. Me badjwÿ gu me ren baje Kritu mar kêt ne ren bamã Metĩndjwÿnh puma: ne. Nhym be, kati. Arÿm ne gu me tu amim me banhõ Bẽnjadjwÿr djwÿnhbê Jeju Kritu markumrêx ne arÿm batĩn prãm kêt. Ne kam arÿm Metĩndjwÿnh pymatio banhõbikwakumrêx ne kum amijarênhõ baba.

¹³ Kam kwãrik wãnh amim mar rerekre kêt. Me amex-tire kadjy ne ba Metĩndjwÿnhmã apê. Nhym kam me arÿm 'ã kum ikurên ijo bikênho ba. Gê me te ijo bikênho ba kwãrik wãnh kam amim mar rerekre kêt. Dja ga me tu amim Jeju mar tÿxkumrêx.

Kute meo Metĩndjwÿnhmã à'wÿr.

¹⁴ Me akĩnh kadjy ne ba arÿm ikõnkrão nhÿn Bẽnjadjwÿr djwÿnhbê Jeju Kritu Bãmmã me ajarê. ¹⁵ Ta ne me kute amim Jeju mar kunĩõ kra. Kàjkwakam me kute amim Jeju marmẽ pykakam me kute amim Jeju marmẽ ne me kunĩõ kra. Ba arÿm kum me ajo a'uw. Nã bãm kum,

¹⁶⁻¹⁷ —Djünwã, ara:x ne adjukapríti:rekôt dja ga memã tỳx jadjà. Gê Akarõ me umar djàkam memã tỳx jadjà gê me kôt tỳ:x ne mrãmri tu amim Kritu markumrêx. Nhyam kam Kritu arỳm mrãmri tu me kadjwỳnhbê ỳrkumrêx. Nhyam kam me arỳm ô'ã kute mrãmri ne pidjô pykakam arê jabjêkam ku'ê tỳx pyràk. Kam dja me mar tỳxkumrêx. Mỳj dja me kuma? Bir, Kritu mrãmri kum me abê:kumrêx. Tãm dja me mar tỳxkumrêx. Ne kam ô'ã mrãmri me kum me abê:kumrêx ne.

¹⁸ Dja me kum me abêkumrêx ne kam arỳm prĩne kuma. Mỳj dja me kuma? Bir, Kritu ta kum me abê:kumrêx. Ja dja me prĩne kuma. Kritu nhõ me ja kunĩ dja me prĩne kuma. Mỳj ne Kritu kum me abêkam kute? Kum me abê ja ne kute mỳjja jabatà:nh pyràk. Mỳjja jabatành ne kum me abê ja'ã amijakre. Me te kute kàjkwa nàr kon, pyka'ã akremãja pumũ. ã abatà:nh ane nhyam me te aktã irê'ỳr bõx ne 'ã akremã. Nàr kon, me te 'ênhõt nàr krax'ỳr bõx ne 'ã akremã. Nàr kon, me te 'ã àbir nàr aparmã rwỳk ne 'ã akremã.

¹⁹ Nãm ã Kritu kum me abê ra:xo ane. 'Ã akre'ỳr me bõx kê:tkumrêx. Me kute mar mex kê:tkumrêx. Kritu kum me abê:ê. Kum me abêo me rer me:x ne. Dja kum me abê rã'ã: rã'ã ne. Nhyam be, Djünwã, dja ga memã akren memã arê gê me kuma. Dja me prĩne Kritu kum me abêja ma ga kam arỳm araxo me kadjwỳnhbê nhỹ. Ne kam me ĩ pỳnhkõt meo tuknĩn prĩne meo aba mex. Nhyam kam me prĩne araxmã katon arỳm prĩne amikam ama. Nã bãm ã me Babãmmã ajarênhõ ane.

²⁰ Metĩndjwỳnh ne ra:xi. Me'õ ne kute raxo têt kêtumrêx. Kute mỳjja kunĩ nhipêx mar. Mỳjja 'õ kubê tỳx kêtumrêx. Djãm me baje kum mỳjja ra:xo badjà'wỳr nhyam te kute me bakadjy ipêxmã nhyam kubê tỳxmã? Kati. Kubê tỳx kêt. Nàr, djãm me baje amim mỳjja ra:x'õ'ã

karõ nhym te kute me bamã ipêx mã? Arkati. Me bamãbit ne kute mỳjja rũnh pyræk. Nhym be, kumã ne mỳjja kunĩ kry:re. Kute mỳjja kunĩ nhipêx kadjy umaro, tỳxo kute me bajakrenh me:xi. Djãm gu me baje kum mỳjja rax'õ jarênh nhym te kute umaje ne ipêx kêtmã. Kati. Tỳxo me bakadjwỳnhbê ỳrkam dja arỳm mỳjja rũnh nhipêx ne.

²¹ Gu me kam kum,

—Me ije amim Jeju mar kunĩ ne ba me amã, “Ara:x ne apyma:kumrêx”, anhỹro iba. Dja ba me aben djô'ã amã arax jarênh rã'ã: rã'ã ne, ane. Gu me ã kum ane.

4

Me kum aben jabê'ã kute memã karõ.

Rô 15.5; Pir 2.1; Ped k 3.8

¹ Ë, Bẽnjadjwỳr djwỳnhmã ne ba apê nhym me 'ã kum ikurên idjuwpre. Ba kam arỳm ar amã 'ã karõ. Katåt ar aje amijo aba kadjy ne Metĩndjwỳnh arỳm amiwỳr ar ajuw ne ar ajo ba. Kam dja gar katåt ar amijo aba nhym Metĩndjwỳnh arỳm ar akam kĩnhkumrêx.

² Dja gar kum amijo angri. Kwãrĩk wãnh amijo adjàmra kêt ne akrànãmã ar amijo aba. Kwãrĩk wãnh memã bêx kêt ne memã aprĩren memã akabên. Gê me'õ ar ajõo bikênh jabej akubyn amijã angryk nê. Ar amã aben jabêkôt amijã angryk nê ne. ³ Metĩndjwỳnh Karõ kute abenã ar amênh gar aje abeno anhõbikwakam aje mrãmri ne me ã pydji pyræk. Kam amã aben jabên abenmã akabên mex jarê. Abenmã akabên mex ry typydji 'ãno djan aben nêje aben pumũ.

⁴ Gwaj baje mrãmri ne me ã pydji pyræk ne ren kam axikôt bakabên. Metĩndjwỳnh Karõ pydji kute gwaj bajo ba gwaj ren axikôt bakabên. Kute amiwỳr gwaj bajwỳr ne gwaj bajo bakam gwaj bakunĩ amiwỳr me'õ pydji kamnhĩxkumrêxo baba. ⁵ Bẽnjadjwỳr djwỳnh pydji:. Gwaj

bakunĩ baje tu amim Jeju pydji: markumrëx ne pydji kôt ar amijo baba nhym me arým ngômã gwaj bajangij. ⁶ Nhym me Batĩndjwýnh pydji kubê ne gwaj bakunĩ Bãm djwýnh ne gwaj bakunĩmã Bënjadjwýr djwýnh. Nãm gwaj bakunĩo ban bakunĩ mẽ amijo kajkep. Ga, gwaj baje mrãmri ne me ĩ pydji pyrækja pumũ.

⁷ Nhym be, ajtekam gwaj banhĩ pýnhkôt apýnh gwaj badjapênh djà. Kritu ta kum gwaj bakaprĩn gwaj banhĩ pýnhkôt arým amim gwaj bajã karõ. Amim gwaj bajã karõn arým gwaj bakunĩmã gwaj badjapênh djà'ã karõ. Gwaj kam banhĩ pýnhkôt arým apýnh badjapênh djà maro baba. Gwaj badjapênh djà'ã ne Metĩndjwýnh gwaj bakĩnh djà jarẽ.

⁸ Amrêbê: gwaj bakêtri ne Metĩndjwýnh me bakukãmãremã kum, “Nãm kàjkwamã wabin amim me uwpre tũm krãptija pytàn meo mõ.

Ne kam pykakam me jamã me kĩnh djà ngã”, ane. Ga, Metĩndjwýnh kute Kritu kàjkwamã àbir jarẽnhja pumũn kam kute memã kĩnh djà nhõrja pumũ.

⁹ Mýj ne kàjkwamã àbir kêttri nẽ? Bir, nãm ruw. Nãm apa:rmã pykamã ruw ne pyka mã: nõ. ¹⁰ Nõ:n kam ta ajte wabi. Kàjkwa kunĩ mýrbê kàjkwa djwýnhmã wabin kam nhỹ. Kute mýjja kunĩ mẽ amijo kajkep kadjy kam nhỹ. Kute kàjkwamẽ pykamẽ amijo kajkep ne o ba kadjy kam nhỹ.

¹¹ Ga, Kritu àbirkam kute memã me kĩnh djà nhõrja pumũ. Tãm ne Metĩndjwýnh me bakukãmãremã arẽ. Mýj'ã ne kute memã kĩnh djà nhõrja amijakre? Bir, kute memã apýnh àpênh djà nhõr'ã ne amijakre. Kritu ne arým gwaj bamã apýnh badjapênh djàri'ã ajarẽ gwaj maro baba. Ar ije 'ã idjujarẽnhmã ne ar ikwýmã 'ã karõn ar ijano. Bar kam ije omũnhkôt memã 'ã idjujarẽnh ar iba.

Nhym kam ajte gwaj bakwýmã apÿnh kabën jarë gwaj maro baba ne arým kukwakam amũ memã kabën jarënho baba. Nhym kam ajte gwaj bakwýmã bakabën mex'ã karõ gwaj me kute Jeju mar kêtjamã arënho baba. Nhym kam me arým amim Jeju maro ba. Nhym kam ajte gwaj bakwýmã me kute Jeju marjao djuw mexo ba'ã karõ. Gwaj meo djuw mexo baba nhym kam me tu amim Jeju mar tÿxkumrëx ne 'ã ukanga kêt ne ar ba. Nhym kam ajte gwaj bakwýmã memã kukràdjà'ã badjujarënh'a karõ gwaj memã 'ã badjujarënho baba. Kritu kute gwaj bakĩnh djà'ã gwaj bamã apÿnh badjàpënh djà nhõr ne ja.

¹² Dja gwaj apÿnh badjàpënh djàjakam apê:, Jeju nhõ me ja prĩne kum mex kadjy apê: nhym kam me adjwÿnhdjwÿ Metĩndjwÿnhmã àpënh ar ba. Gwaj me kadjy badjàpënh ar baba nhym me kunĩ arým Kritu mar mexo amũ amikamën arým amim mar ra:x ne. Me kute Kritu mẽ ĩ pydji pyræk ja arým amim mar ra:x ne. ¹³ Djãm kam dja gwaj Metĩndjwÿnh Kra mar punun kam bakabën kajgo'õ mÿr jabej abenmã bakabën ar baba? Kati. Dja gwaj Kra'ã bakabën pydjibit man axikõt arën tu amim markumrëx. Ne kam baje me prĩre pyræk kêt ne Kritu mar rerekre kêt ne bajabatànhkumrëx. Ne kam prĩne amim kuman arým amim mar ra:xkumrëx.

¹⁴ Djãm gwaj bano rerekre kute me prĩre no rerekre pyræk rã'ãmã? Nhym apÿnh me 'ëxnhĩ mrãn bõx ne no tÿxtikam ari gwaj banoo biknoro bamã? Me kute ari apÿnh me kukràdjà jarënho kute kõk, kute ngõ djækà ari mÿjja japĩn pyræk. Djãm gwaj baje jãm Kritukõt bakabën djir ne ajte jãm me kukràdjà punukõt bakabën djir ne ari: bakabën jadjwÿro babamã? Kati.

¹⁵ Gwaj ba dja gwaj bamã aben jabën bakabën katàtbit jarën arým kàjmã Kritumã aben kamënho tẽ. Baje mar mexo, kum bamexo kàjmã aben kamënho tẽ. Ga, gwaj

bakrāja pumū. Gwaj bakrākam badjumar ne kam amū banhikrao apê nār baparkam mrā. Gwaj bakrā ne amū gwaj bakukràdjà kunī ngrēk ne gwaj bajo ba. Gwaj bakrā kumrēx umar nhym kam ô'ā amū gwaj bakukràdjà kunī apê. Kritudjwỳ ne kute gwaj bakrā pyrāk ne gwaj bakunīo ba gwaj kukwakam apỹnh kum badjapēnh djàri kum badjapēnh ar baba.

¹⁶ Ga, gwaj bapar, bate, bapa, banhikra, bano, banhijākre, bakukràdjà kunī:, kunī apỹnh gwaj bakudjēkkôt kute aben jamỹnh tỳx, kute abenmā tỳx jangjēnh mex. Ne ren gwaj bakudjēk kêt gwaj ren bakukràdjà kunī ren aben bê ajka'u gwaj ren kam kājma baku'ê kêt. Kritudjwỳ ne ā ane. Nām gwaj bakrāptīo ōbikwa gwaj banhī pỹnhkôt apỹnh kum badjapēnh djàri. Gwaj kam baje aben jamỹnh tỳx mǎn prābê abeno banhōbikwan baro'ā Kritumā apê. Te apỹnh kum badjapēnh djàri gwaj baro'ā kum badjapēnh ar baban o abenmā tỳx jangjēho baba. Kute gwaj bamā badjapēnh djà'ā ujarēnh kôt gwaj kum badjapēnh ar baba. Gwaj bamā aben jabēo ro'ā aben kamēnh mō. Gwaj baje mar mexo, kum bamexo aben kamēnh mō.

Me kute me kukràdjà punu kôt amijo ba kêtma.

Kor 3.5; Ped k 4.7

¹⁷ Ije ar amā ja jarēnhkam djām ar aje arek amijo aba tūm kôt amijo aba rā'āmā? Amrēbê ne gar ate Metīndjwỹnh bê ar amijo aban me bajtem kukràdjà punu kôt ar amijo aba. Djām aje arek me kukràdjà punu kôt amijo aba rā'āmā? Kati. Tām ne ba ar abê uma:. Me wā ne me amim mỳjja kajgobit'ā karōo ba.

¹⁸ Nām me tu amakkre kêt kumrēx. Nhym me te kute memā mỳjja mex'ā karō nhym me kute mar kêt kumrēx. Mỳjja'ā me kabēn kute amijakreja ne me kute mar kêt kumrēx. Kam ne me arỳm umar djākam mỳjja punubit

man arĩk ar ba. Arĩk ar ba kute mrãmri ne akamàt kô tykkam me arĩk ar baja pyræk. Nãm me Metĩndjwỳnhbê: amijo ban kam kôt tĩn ne ar baja mar kêtukumrêx. ¹⁹Nhym ren me me akre ren me amimaro tẽn ren arỳm amim ngryk ne. Nhym be, kati. Me ja ne me kute amimar kêtukumrêx ne kam kute kurêbit mar ne aben bê me kupênh ra:x ne mỳjja punu kunĩ nhipêxo ban ajbit mar prã:m ne.

²⁰Nhym be, Kritu. Djã ne gwaj bamã,

—Ajrã mekôt ã amijo ane, ane? Arkati. ²¹Arỳm ne gar mrãmri Jeju kabẽn katàt kôt ama. Nãm amã, “Kwãrĩk wãnh”, ane. Nàr ar akwỳ aje mar kajgo jabej ba ajte ar amã tãm jarẽ. ²²Amrêbê ne gar me kum Metĩndjwỳnh kĩnh kêtja kukràdjã kôt ar amijo aba. Aje kangamã. Me kukràdjã kôt ne me kum mỳjja punu prãm ne amim 'êx ne amim, “Ajrã, kam amexkumrêx”, anhỹro ba. Aje me kukràdjã ja kangamã. ²³Adjumar djã ny kadjy aje amimarmã. ²⁴Ne amrãnh nymã ne mrãmri Metĩndjwỳnh katàtkôt katàt aje amijo abamã ne mexo amexmã.

²⁵Kam memã ajêxo abaja tu wãnh kangakumrêx ne abu'ã me kunĩmã akabẽn katàtbit jarẽ. Mỳkam? Bir, Kritu amikôt gwaj bakunĩo ba gwaj baje kumẽ banhĩ pydji pyræk. Kam dja gwaj memã bakabẽn katàt jarẽ.

²⁶Godja ga angryk jabej kwãrĩk wãnh kam ajaxwe kêt. Kwãrĩk wãnh angryk'ã akamàt kêt ne angryk 'iry kêt. ²⁷Ajaxwe kêt gê Xatanaj akam ãm kêt.

²⁸Kwãrĩk wãnh ar ajõ adjãkĩnhĩ ajte mỳjja 'õo adjãkĩnh kêtukumrêx. Ga dja ga adjãpênh tỳx ne anhikrao katàt mỳjja kupênh mex. Ne kam adjãpênh pãnh arỳm amim anhõ mỳjja jamỳ. Ne kam arỳm amikutã me õ mỳjja kêtjamã kwỳ ngã.

Me kabẽn mex'ã kute memã karõ.

²⁹ Kwārīk wānh akabēn punu'ō jarēnh kêt. Memã akabēn mexbit jarē gē me kuman mex. Gē me mexo amũ amikamēn arỳm mexkumrēx.

³⁰ Kwārīk wānh Metīndjwỳnh Karōmã kaprī jadjàr kêt. Metīndjwỳnh ne arỳm ar amã ano nhym amim ar ajo ba. Nhym o kute mrãmri ne arỳm ar ajã kute aminhidji nhôr pyræk.* Dja Karō arek amim ar ajo ba: nhym kam Jeju arỳm bôx. Bôx ne amikôt ar ajo mō.

³¹ Dja gar wānh angryk, kam amadjàkam atokryja wānh kanga. Ne wānh mekam adjàkrēmē angrykmē akabēn punumē wānh kangakumrēx. Ar aje meo abikēnh'ã amim karōja kunī dja ga wānh kangakumrēx.

³² Ar ga dja gar amã aben kaprīn abenmã abēn rerek ne aben jaxwe maro aknon abenkam angryk kêt. Mỳkam? Bir ga, Metīndjwỳnh arỳm Kritu tykkôt kute ar ajaxwe maro biknor ne ar akam ngryk kêtja pumũ. Kam dja gar aben jaxwe maro aknon abenkam angryk kêt.

5

¹ Ga, me bãm kum kra jabê nhym kute bãm kôt amijo baja pumũ. Nãm kute amim,

—Ba djünwã kudjwa, ba djünwã kudjwa, anhỹro ba. Metīndjwỳnh kum ar ajabêkam dja gar kôt ar amijo aban kudjwa amã me abêo aba. ² Ga, Kritu kum gwaj bajabê:ja pumũ. Ne kam arỳm gwaj bajaxwe pãnh Metīndjwỳnhmã amingã nhym me kam kubĩ nhym arỳm gwaj bajaxwe pãnh ty. Kritu kute mrãmri ne mry bĩn pyræk, me kute amrêbê me axwe pãnh kute Metīndjwỳnhmã mry par

* 4:30 Ga, me kute mỳjja'ã aminhidji janhôr nhym arỳm amirĩtkumrēxja pumũ. Ar gadjwỳ Metīndjwỳnh arỳm ar amã Karō jano nhym ar ajo ba gar arỳm amim, “Mrãmri ne arỳm ijo krakumrēx. Ga, arỳm kute imã Karō janor nhym kute ijo baja pumũ”, ane.

pyràk. Me kum mry pan kubô nhym arým ardjành bãn kĩnh ne. Dja gar Kritu kudjwa ã amã me abêo ane nhym arým akam kĩnhkumrêx ne.

Apÿnh me axwe djàri nêje kute me kukrà.

A Xim 2.4; Xij 4.4; Dju k 1.6, 2.15

³ Nhym be, me mjên djwÿnh nàr prô djwÿnh kupa'ã kurê ba. Nàr me àpênh punu:re kunĩ nhym me arým mekam pijàm ne. Nàr me kute mÿjjao atom rÿnh prã:m. Kwãrik wãnh ar ajô amijo anhÿr kêtukumrêx gê me ajarênh kêtukumrêx. Djãm Jezu nhô me ja kute ã amijo anhÿrkam mex got? ⁴ Nàr, me kabênkamdjwÿ. Ar amy aje me nire kukràdjà'ã me aprÿ nhym me ar akam pijàm. Nhym ar anire aje me my kukràdjà'ã me aprÿ nhym me ar akam pijàm. Nàr, ar abixaêrkôt ar akabên kajgo. Nàr me keket kadj ar amy me ni'ã abêno ajkê nhym ar ani amipãnh me my'a abêno ajkê. Ar akabên ja ne mex kêt. Kwãrik wãnh memã arênh kêt. Atemã dja gar memã Metĩndjwÿnhkam amikĩnh jarê.

⁵ Nhym be, me mjên djwÿnh nàr prô djwÿnh kupa'ã kurê ba. Nàr, me àpênh punu:re nhym me mekam pijàm ne. Nàr, me kute mÿjjao atom rÿnh prã:m. Me ja ne me mrãmri ne me kute mÿjjao metĩndjwÿnh karô nhipêxmã amijarênh ba pyràk. Djãm me ja Metĩndjwÿnh kute meo bamã? Djãm Kritumê Metĩndjwÿnh ar me kunĩmã Bênjadjwÿrkam djãm ar kute meo bamã? Nàr, djãm ar kute me jamã ar ô mÿjja nhôrmã? Arkati. Ja ne gar aje amrêbê mar. ⁶ Ar aje markam kwãrik wãnh me'ô ajte kabên kajgoo arík ar amã,

—Ajrã. ã ajaxweo ane. Dja Metĩndjwÿnh ajmã ajo kêtukumrêx, anhÿr kêt. Kwãrik wãnh o anoo biknor kêt. Me amakkre kêt prãm kute ã axweo anhÿr prãmkam ne

Metĩndjwýnh arým mekam ngry:k ne. ⁷ Kam kwãrik wãnh mekôt ã ar ajaxweo anhÿr kêt.

⁸ Mÿkam? Bir, amrêbê ne gar ajaxwe:n aje akamàt kô tykkam me ar baja pyræk. Nhym be, jakam ne gar arým Bẽnjadjwÿr djwýnh kôt ar amijo aban arým aje a'uri me ar baja pyræk. Bẽnjadjwÿr djwýnh kute ar ajo krakam dja gar ajmã akute kêt ne katàt ar amijo aba. Dja gar aje mrãmri ne me a'uri ar baja pyræk. ⁹ Metĩndjwýnh Karõ dja meo ba nhym kam me ô'ã ukaprikumrêx ne katàt kute kabên jarênhkumrêx ne 'êxnhĩ kêtumrêx.

¹⁰ Dja gar Bẽnjadjwÿr djwýnho kĩnh, mÿj akabênkôt, aje mÿjo abakôt aje Bẽnjadjwÿro kĩnh jabej amikabi. ¹¹ Ne kwãrik wãnh me axwe kôt ajaxwe kêt. Me axwe ne me kute akamàt kô tykkam me àpênh punu pyræk. Djãm me àpênh punu djô'ã mÿjja mex got? Arkati. Kwãrik wãnh me axwe kôt ar ajaxwe kêt. Ar ga dja gar me axwe nêje me kukrà.

¹² Mÿkam dja gar me axwe kôt ajaxwe kêt? Bir, me me kãxã apdjun ba punukumrêx. Gwaj ren abenmã me arên ren bapijà:m ne. ¹³ Me axwe ne me apdjun àpênh punuo ba: nhym me arým memã Metĩndjwýnh kabên jarê. Nhym kam me arým amijaxwe ma. Me kute memã arênh nhym me kute amimar kute mrãmri ne me kute memã mÿjja kurwÿkam mÿjja kunĩ kum amirĩt pyræk. ¹⁴ Me kute memã Metĩndjwýnh kabên jarênhkambit ne me arým kute amijaxwe kunĩ mar. Amrêbê: ne me me bakukãmãremã me kute amijaxwe mar'ã ajarê. Me memã kum,

“Kute mrãmri ne me õto nõrkam kute me kabên mar kêt pyræk ne ga aje Metĩndjwýnh mar kêt.

On ano tÿx ne amim kabên ma kute mrãmri ne me krã apôx ne no tÿxkam amak mex pyræk.

Aje kabĕn mar kĕt kute mrāmri ne me tyk kute me kabĕn mar kĕt pyrāk. On kabĕn man kĕt ar amijo aba kute mrāmri ne me tyk ne akubyn tĭn ne ar ba pyrāk.

Dja ga kabĕn ma nhym Kritu arÿm prĭne amā arĕ ga prĭne amima.

Kute mrāmri ne me kute memā pōk ne o kute pry kurwÿ nhym kam me kute prĭne rĭt mex pyrāk”, ane.

Mrāmri ne me kute me bakukāmāremā arĕnhkumrĕx. Mrāmri ne Metĭndjwÿnh kute memā arĕnh ne kute me axwe kunĭo amirĭtmā.

¹⁵ Kam dja gar amijā ano tÿx ne katāt ar amijo aban ajmā akute kĕt. Djām ano kĕtmā? Kati. Dja gar akrā mex ne amijā ano tÿ:x ne katāt ar amijo aba. ¹⁶ Ar abu'ā me axwe kunĭja dja gar me'ā ano tÿ:x. Nhym kam ar aje memā Metĭndjwÿnh kabĕn jarĕnh djā ar awÿr bōx gar arÿm memā arĕ. Akati jakam me axwe krāptĭkam dja gar ā memā ane.

¹⁷ Kam kwārĭk wānh ar akrā punu kĕt. Dja gar amijo Bĕnjadjwÿr djwÿnh man kum,

—Mÿj dja ba nĕ ga kam arÿm ikam akĭnhkumrĕx jabej? ane. Dja gar ā kum anen arÿm prĭne amijo Bĕnjadjwÿr djwÿnh markumrĕx.

¹⁸ Kwārĭk wānh kadjwati kangōkam* ar abibānh kĕt. Kam ne me arÿm amijo ajkĕn punu mex ne. Ar ga dja gar Metĭndjwÿnh Karō mar tÿx ne 'ā adjukanga kĕt gĕ ar anhĭ pÿnhkōt raxo ar akadjwÿnhbĕ nhÿn ar ajo ba mex.

¹⁹ Dja gar mar tÿx ne abenmā mebĕ idjaer nhō me ngrer tÿm jarĕ, me ngrerkōt Bĕnjadjwÿr djwÿnhmā mextire jarĕ. Metĭndjwÿnh'ā me ngrerja kunĭ jarĕ. Djām ate akrān ajajkwa kajgokambit aje Bĕnjadjwÿr djwÿnhmā me ngrer

* ^{5:18} Mÿjja me kute o kōm ne kĕt bibānh kunĭja, kadjwati kangōmĕ uba kangōmĕ, mÿjja kangō kunĭ ne me kum kadjwati kangō jarĕ.

jarēnhmā? Kati. Dja gar amikam me ngrerkam kabēnja markumrēx ne angrerkôt kum arēnhkumrēx.

²⁰ Dja gar Karō mar tỳx ne mā Metīndjwỳnhmā, me Babāmmā amikīnh jarē. Mỳjja kunikôt kum amikīnh jarē. Djām ar adjumar mexkambit dja gar kum amikīnh jarē? Kati. Ar adjumar punukamdjwỳ dja gar kum,

—Djūnwā, te idjumar punu ga mā ijo djuw mex ne mā ijo kīnh. Bēnjadjwỳr djwỳnhbê Jeju Kritu ba tu amim markumrēx ne arỳm amā amikīnh jarē, ane. Dja gar akati kunikôt ã kum amikīnh jarēnho ane.

²¹ Dja gar akrānmā aben kabēn man kôt ar amijo aba. Ar aje Metīndjwỳnh pyma markam dja gar ã amijo abao ane.

Prōmē mjēnmē abenā memā karō.

Kô k 11.3; Kor 3.18; Ped k 3.1

²² Me aniremā ne ba ikabēn jarē. Dja gar amjēn kabēn man akrānmā kôt ar amijo aba. Aje mrāmri ne Bēnjadjwỳr djwỳnh kôt ar amijo aba pyrāk dja gar ã amjēn kôt amijo abao ane. ²³ Mỳkam? Bir, ar amjēn ne ar ajo ba kute mrāmri ne me krākam umar ne o kute amingrēk ne ba pyrāk. Me krākam ne me umar ne kam amũ ikrao apê nār parkam mrā. Me krā ne amũ me kukràdjà kunĩ ngrēk ne meo ba. Nām Kritudjwỳ ã me kute amim marja kunĩo ane. Ta ne kute me krā pyrāk ne meo ba. Ne kam arỳm me utàn meo ba. Ō me kunĩ ne me kute ta ĩ pyrāk nhym me utàn meo ba. ²⁴ Nhym kam Kritu nhō me kute amim mar kunĩja akrānmā kabēn man kôt amijo ba. Dja me aniredjwỳ ã amjēn kabēn kunĩ mar ne kôt amijo abao ane.

²⁵ Me amymādjwỳ ne ba ikabēn jarē. Dja gar amā aprō jabê: kute Kritu kum ō me kute amim marja kunĩ jabê pyrāk. Ga, Kritu arỳm me kadjy tykja pumũ.

²⁶ Mỳj kadjy ne me kadjy ty? Bir, prīne kute meo mex kadjy. Kute mrāmri ne me kute ngô kuběkà pōnh nhym

přine mex pyræk. Mrãmri ne kabën kute ngô pyræk ne přine meo mex. Kritu memã kabën jarë nhym me amim kuman arým Metĩndjwýnh mexo mex. Ja kadjy ne Kritu me kadjy ty. ²⁷ Ő me kute amim marja kunĩ přine kum me: xkumrëx nhym me arým kum me kĩ:nhkumrëx nhym kam kute amikabem me umjýr ne kute ar meo ba kadjy. Ja kadjy ne Kritu me kadjy ty. Dja ō me ja kute ta ĩ pyrækja přine mexkumrëx ne axwe kêtikumrëx kute mrãmri ne me kã mjô kêtikumrëx ne ngrã kêtikumrëx nhym mýjja 'ô kute meo bikënh kêtikumrëx pyræk. Dja me Metĩndjwýnh mexo mex ne kum punu kêtikumrëx nhym arým meo ba. Ja kadjy ne Kritu me kadjy ty. Be, djãm kum ō me ja jabê ngri: got?

²⁸ Bir be, me mydjwý dja me ã kum prô jabêo ane. Kum prô jabêo kute mrãmri ne me kum aminhĩ jabêja pyræk. Me kum prô jabêja ne me kum aminhĩ jabê. ²⁹ Djã nãm me'ô kum aminhĩ kurê? Kati. Me kum aminhĩ jabê ne ô kwý krënmë kubëkãmë mýjja kunĩo aminhĩo djuw mex.

Nãm ã Bënjadjwýr djwýnh me baje Kritu mar djwýnho djuw mexo ane. ³⁰ Me banhĩ pýnhkôt ne gu me baje Kritumë banhĩ typdji pyræk. Baje Kritu pa pyræk, no pyræk, par pyræk. Baje ta kukràdjã kunĩ pyrækkam ne Kritu amim me bajo djuw mex.

Dja ã me amim prôdjwýo djuw mexo ane. ³¹ Amrëbê: ne me bakukãmãre 'ã memã kum,
 “Kamã dja me my prô kadjy arým bãmmë nã arkum iren kam arým prôbit'ã ngrã ne.

Nhym kam ar ĩ abenã tým ne kam kute ĩ typdji pyræk.”
 Nãm me bakukãmãre ã memã ane.

³² Be, ije ar amã kukràdjã jarënhja ne me kute přine mar mex kêtikumrëx, mebê týt. Kritumë me bamë ō me kute amim marja kunĩ'ã ne ba ikabën ja jarë.

³³ Kam ne ba ar amã aprõ jabêkumrëxmã ar amã 'ã karõ. Kute mrãmri ne ar amã amijabê pyrãk ne ar amã aprõ jabên aje o djuw mexmã. Nhym ar anireja, ar amjên ne ar ajo ba. Kam ar aje amijã marmã ne ba ar amã 'ã karõ. Tãm ne ja.

6

*Bãmm*ẽ kramẽ abenã memã karõ.

Kor 3.20

¹ Jakam ne ba me aprĩremã 'ã karõ. Bënjadjwÿr djwÿnh kabênkõt dja gar abãmmẽ anã kabên man ar kabên kõt ar amijo aba. Ja ne mex. ²⁻³ Mÿkam? Bir, amrêbê: Metĩndjwÿnh me bakukãmãremã kum,

“Me amã abãmmẽ anã jabên ar kabên ma.”

Nãm ã memã anen kam kõt memã mÿjja mex jarên memã kum,

“Kam arÿm adjumar mex ne kribêm pykakam ar aba”,
ane.

Metĩndjwÿnh kute memã 'ã karõkõt kukràdjà ne ja. Kukràdjà kumrëx kute kõt memã mÿjja mex jarênh ne ja. Kam dja gar mar tÿx ne.

⁴ Ne ar amy, ar ajabatànhwãdjwÿ, ar amã ne ba 'ã karõ. Kwãrĩk wãnh akra arkum amikurê'uk kêt. Ari arkum adjãkrêo kum amikurê'uk kêt. Ar ga dja gar akumrëx amijã Bënjadjwÿr djwÿnh kabên man arÿm katàt kõt ar amijo aba. Ne kam kõt axwe nêje ar akren kam mrãnh mex'ã arkum karõ. Dja gar ã akra aro ane gê ar akõt Metĩndjwÿnh kõt ar amijo ba.

*Bënjadjwÿrm*ẽ õ àpênhmẽ abenã memã karõ.

Kor 3.22; Xim k 6.1; Xit 2.9; Ped k 2.18

⁵ Ar akwÿ ne me arÿm amim ar apa 'amÿ gar memã adjàpênh tÿx kajgo ar aba. Ar amã ne ba ikabên. Dja gar pykakam ar anhõ bënjadjwÿr kabên ma. Ar anhõ bënjadjwÿr raxmẽ uma dja gar aman kum adjàpênh katàt.

Kute mrãmri ne Kritumã ar adjàpênh pyræk dja gar ã kum adjàpênh ane. ⁶Djãm ar aje anhõ bẽnjadwjyrmã ýtãbit kum adjàpênh katàtmã? Kati. Ar amã kàxkamdjwý dja gar amim,

—Kati, Kritumã ne ba apê. Kam dja ba Metĩndjwýnh kabên kôt mrãmri pykakam inhõ Bẽnjadwjyrmã idjápênh katàtkumrêx. ⁷Dja ba kabên man kum idjápênhkam ikĩnh. Nã bãm kute pykakam memã idjápênh pyræk. Nhyr be, kati. Kàjkwakam Bẽnjadwjyrmã djwýnhmã ne ba apê, ane. Dja gar ã amim anen kam kum adjàpênhkam akĩnh.

⁸Mýkam? Bir, ar akwý apa 'amýnh aje me kabên kôt adjàpênh týx kajgo ar aba. Bẽnjadwjyrmã djwýnh Jeju kute aparmã ar adjàpênh pumũnh. Ar adjàpênh mex kôt dja ar amã o pãnh mex. Nàr ar akwý apa 'amýnh kêtã ne ar ga gar adjàpênh ar aba. Me kute ar amã o pãnh kady gar adjàpênh ar aba. Bẽnjadwjyrmã djwýnh kute ar adjàpênh pumũnh. Ar adjàpênh mex kôt dja ĩ ar amã o pãnh mex. Me akunĩ adjàpênh mex kôt dja ta amã o pãnh mex. Tãm ne gar amrêbê ama.

⁹Ne bẽnjadwjyrmã ar, ar aje amim me pa 'amýnh nhyr me ar amã àpênh kajgo ar bawã ar amã ne ba ikabên. Dja gar ije ajbir ar anhõ àpênhmã ikabên jarênhja ma. Ikabên kôt ar gadjwý ar anhõ àpênhmã amex. Kwãrik wãnh aje meo abikênhmã me kangrônho aba kêt. Djãm bẽnjadwjyrmã'ã apydji? Kati. Ar gadjwý ne kàjkwakam ar anhõ Bẽnjadwjyrmã djwýnh. Tãm ne ba ar amã arê gar amrêbê aje mar. Ta ne kum me'õ pyma kêtumrêx.

Metĩndjwýnh nhõ kàxo kubêkà'ã ujarênh.

Rô 16.20; Tex k 5.8; Xij 4.7; Ped k 5.8

¹⁰Akmere àpnhĩre ar, ije ar amã arênh ino rer kady ne ja. Bẽnjadwjyrmã djwýnh tý:xi. Atýx kady gora amim maro aba nhyr arým ar amã atýx jady. ¹¹Me karõ punu nhõ bẽnjadwjyrmã kute gwaj bamã 'êx ne gwaj banoo biknor

prämkuvrëx. Dja gar amijã ano tÿx ne arek kubê dja nhym arÿm ar anoo biknor kêt. Arek kubê ar adjãm ne aje kangõnh kadjy dja gar aminêje Metĩndjwÿnh nhõ kàxo kubêkà jangjê, kute gwaj bamã kàxo kubêkà nhõr kunĳja aminêje angjê.

¹² Mÿkam dja gar angjê? Bir, djãm me ĩ, gwaj baje me omũnhja ne gwaj baje aminêje me kangõnhmã? Kati. Me karõ punu pumũnh kêtja. Apÿnh me axwe nhõ bēnjadjwÿr ja ne gwaj baje aminêje me kangõnhmã. Apÿnh me karõ punu, me rũnh 'itÿx ja ne gwaj baje aminêje me kangõnhmã. Pykakam me axwe prãmja ne me kute mrãmri ne akamàt kô tykkam me mrãnh punuja pyræk. Me ja nhõ bēnjadjwÿr ne gwaj baje aminêje kangõnhmã. Kàjkwakam me karõ jaxwe ar baja. Me karõ punu ja ne gwaj baje aminêje me kangõnhmã. ¹³ Kam, dja gar aminêje Metĩndjwÿnh nhõ kàxo kubêkà kunĳ jangjê. Dja aje me kangõnh nhõ akati awÿr bõx ga mebê atÿx ne me kangõho dja. Ne kam arÿm meo apan me kujate. Kam dja ga arek mebê adjãm tÿx rã'ã.

¹⁴ Be, mÿj dja mebê ar anhõ kàxo kubêkàja kute gar aminêje angij? Bir, ajêxnhĩ kêt ne akabēnkumvrëx. Ajêxnhĩ kêt kadjy ne ar anhõ kàxo apre djà. Ga, krākamngõnh kàxo pre djào kute kà janēnh tÿxja pumũ. Kute o kàxo kubêkàja kunĳ janēnh tÿx nhym arÿm 'ã rorok kêt. Ar gadjwÿ ar aje apre djào amikrax pre mãn pràbê ajêxnhĩ kêt ne akabēnkumvrëx. Akabēn kajgo kêt ne arek me karõ punu kangõho dja. Nhym kam me te kute Metĩndjwÿnhbê ar ajo akēxmã.

Metĩndjwÿnh kabēnkôt dja gar katàt ar amijo aban ajaxwe kêt. Akatàt jabê ne anhõ kàxo anhinòkà. Ga, krākamngõnh kute kurê djwÿnhbê amipytar kadjy kute kàxo inòkà jangjēnhja pumũ. Ar gadjwÿ ar aje kàxo ar anhinòkà jadjar mãn pràbê ajaxwe kêt ne Metĩndjwÿnhmã

akatàt. Ne arým me karõ punubê amipytàn aminêje kangõnho dja.

¹⁵ Ar prĩne 'ã ujarẽnh nyja ma. Aje 'ã ujarẽnh ny mar jabê ne ar aparkà tỳx. Ga, krākamngõnh kute parkà tỳx jangjênhja pumũ. Kurê djwỳnh'ỳr prõt ne kute amiparo bikênh kêt kadjy ne kute parkà tỳx jangjênh. Ar gadjwỳ ar aje ar aparkà tỳx jadjàr mãn pràbê dja gar Kritu'ã ujarẽnh ny kôt adjumar mexja prĩne aman arým me'ỳr mrãn memã arẽ. Dja gar memã arẽn arým o aminêje me karõ punu kangõnho dja nhym me te: kute Metĩndjwỳnhbê ar ajo akẽxmã.

¹⁶ Dja gar kam tu amim Metĩndjwỳnh markumrẽx. Aje tu amim markumrẽx jabê ne ar anhõ kàxo kruwbê àptàr djà. Ga, krākamngõnh kute kruwbê àptàr kadjy kute amỳnhja pumũ. Ar gadjwỳ ar aje anhõ kruwbê àptàr djà byr mãn pràbê tu amim Metĩndjwỳnh markumrẽx. Tu amim markumrẽx ne arým arek me karõ jaxwe nhõ kruwbê adjàptàro dja. Aje tu amim markumrẽx jao dja ga õ kuwyo kruw kunibê aptàn mã pa. Me kabẽn punu, apỳnh me kaprĩ djàri, apỳnh me tokry djàri ne kubê me karõ jaxwe nhõ kuwyo kruwja. Ar aje tu amim markumrẽxjao dja gar mã pa. Nhym me te: kute Metĩndjwỳnhbê ar ajo akẽxmã.

¹⁷ Mrãmri ne Metĩndjwỳnh arým kute amim ar apytàrkumrẽx. Ja dja gar tu amim markumrẽx. Jabê ne ngõnho ar akrãdjê. Ga, krākamngõnh kute amikrã pytàr kadjy kute ngõnho krãdjê turja pumũ. Ar gadjwỳ ar aje ngõnho akrãdjê tur mãn pràbê tu amim ja markumrẽx. Mrãmri Metĩndjwỳnh arým kute amim ar apytàrkumrẽxja markumrẽx. Ne kam arek me karõ punu kangõnho dja nhym me arým te kute Metĩndjwỳnhbê ar ajo akẽxmã.

Dja gar ajte prĩne Metĩndjwỳnh Karõ kabẽn man memã arẽ. Aje kabẽn mar jabê ne ar anhõ kàxdjwa kajgo. Ga, krākamngõnh kute kurê djwỳnho àpanh kadjy kute õ kàxdjwa kajgo jamỳnhja pumũ. Ar gadjwỳ ar aje ar anhõ kàxdjwa kajgo byr mãn pràbê prĩne Metĩndjwỳnh Karõ kabẽn man memã arẽ. Ne arỳm me karõ punu kangõnh dja nhym me arỳm te kute Metĩndjwỳnhbê ar ajo akẽxmã.

¹⁸ Dja gar kam Metĩndjwỳnhmã akabẽno aba. Kum mỳjja kunĩo a'wỳ. Akati kunĩkõt kum ar akabẽn jarẽ. Aje Metĩndjwỳnh Karõ mar'ã ar amã djukanga kêt gê prĩne ar ajo ba mex. Prĩne kute ar ajo ba mexkam mã Metĩndjwỳnhmã akabẽn jarẽ. Kum Jeju nhõ me ja kunĩo a'wỳ. Ar ano tỳx ne amã djukanga kêt ne meo a'wỳ.

¹⁹ Badjwỳ kum ijo a'wỳ gê ijamak'ỳr kabẽno bõx ba gop imã me uma kêt ne memã kabẽn jarẽ. Me krãptĩ kute Kritu'ã ujarẽnh ny mar kêt rã'ã. Ba gop me kunĩmã arẽnh amirĩtkumrẽx gê 'ã ujarẽnh ny memã amirĩtkumrẽx. ²⁰ Ba ne ba Bẽnjadjwỳr djwỳnh kabẽnkõt memã 'ã ujarẽnh ny jarẽnh iba nhym me arỳm kàxiràx jao idjuwpre. Dja gar kum ijo a'wỳ gê me te arỳm idjuwpre ba gop imã me uma kêt ne memã arẽnhkumrẽx ne gop mrãmri kabẽnkõt ibê 'ã idjujarẽnh djwỳnhkumrẽx ne memã arẽnhkumrẽx.

²¹⁻²² Xikiku ne ba arỳm ar amã ano. Imã gwaj bakamy Xikiku jabêkumrẽx nhym Bẽnjadjwỳr djwỳnhmã àpẽn katàtkumrẽx ne 'ã ukanga kêtumrẽx. Ba arỳm ar amã ano. Gêdja ar awỳr bõx ne arỳm ijã ar amã ajarẽ. Mỳjja kuni'ã ar amã ajarẽ gar arỳm iman arỳm ikam adjumar punu kêt ne akĩnh.

²³ Metĩndjwỳnhbê ne me Babãm. Ne Bẽnjadjwỳr djwỳnhbê ne Jeju Kritu. Gê ar ar aje abeno akamywão djuw mex gar adjumar mex ne amã aben jabêkumrẽx ne tu amim ar markumrẽx. ²⁴ Ar amã Bẽnjadjwỳr djwỳnhbê

Jeju Kritu jabêkumrêx ne 'ã adjukanga kêtja gê ar tu kum ar akaprîkumrêx.* Tãm ne ja.

* 6:24 Djãm ar ga ne gar adjukaprî nhym ar pãnh ar`ym kum ar akaprî Kati. Ar ta ne ar tu kum ar akaprîkumrêx.

Metĩndjwỳnh Kute Memã Kabẽn Ny Jarẽnh
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

